

四庫全書

經部

欽定四庫全書

經部

春秋識小錄卷一
一至三

詳校官監察御史王爾烈

給事中臣溫常綬覆勘

總校官檢討臣何思鈞

校對官中書臣孫溶

謄錄監生臣金世英

欽定四庫全書

經部五

春秋識小錄

春秋類

提要

臣等謹案春秋識小錄九卷

國朝程廷祚撰廷祚字啓生上元人嘗舉博學鴻詞又舉經學著述頗多是書凡春秋職官考略三卷春秋地名辨異三卷左傳人名辨異三卷其考職官首為數國共有之官次為

一國自有之官皆分別排纂凡與周禮異同者一根據註疏為之辨證頗為精核末為晉軍政始末表序晉軍八變之制而詳列其將佐之名又以御戎戎右附表於後亦皆整密惟署諸國而獨詳晉則未知其例云何也其考地名首為地同而名異次為地異而名同末為晉書地理志證今以杜預註左傳皆用晉代地名故也其辨人名由一人二名以逮一

人八名者皆彙列而分註之大致與春秋名
號歸一圖互相出入而較為簡明雖似與經
義無闕然讀經讀傳者往往因官名地名人
名之舛異於當日之事蹟不能融會貫通因
於聖人之褒貶不能推求詳盡如胡安國之
誤執季孫橫生異論者蓋有之矣則廷祚是
書固讀春秋家所當知也乾隆四十五年三
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

春秋識小錄卷一

上元程廷祚撰

春秋職官考略上

宰

周禮天官卿曰太宰其屬有小宰宰夫等官春秋諸國雖有此官然其爵命未必相同其職司亦未必盡與周禮合今但以類相從云耳

周

隱元年宰咺杜氏以爲天子大夫疏引宰夫職曰凡
邦之弔事掌其戒令與其幣器財用謂既掌弔
事或即充使咺蓋宰夫也周禮宰夫下大夫也

桓四年宰渠伯糾

僖九年宰周公會諸侯杜曰天子三公

僖三十年宰周公來聘杜曰天子三公兼冢宰也

宋

太宰 少宰
春秋宋國職官備于他國故今俱以宋爲首

桓二年宋殤公時華督爲太宰已而督弑殤公諸侯受其賂遂相宋公按此則太宰宋之相也

成十五年向帶爲太宰魚府爲太宰

襄九年宋災使西鉏吾庀府守杜曰鉏吾太宰也府六官之典正義曰鉏吾太宰傳無其文說本賈逵

襄十七年皇國父爲太宰

魯太宰宰人

隱十一年羽父請殺桓公將以求太宰按自是以後
魯無太宰矣

哀三年桓僖宮災子服景伯命宰人出禮書以待命
杜曰宰人冢宰之屬

齊

昭二十七年齊侯飲魯昭公酒使宰獻而請安疏曰
燕禮者公燕大夫之禮也公雖親在而別有主
人鄭元云主人者宰夫也宰夫太宰之屬掌賓

客之獻飲食者也

鄭太宰

襄十一年諸侯復伐鄭鄭使良霄石奭如楚告將服
于晉按石奭爲良霄之介則太宰之官非鄭所
重矣又昭元年趙孟曰武請于冢宰矣杜曰冢
宰子皮則鄭上卿又有冢宰之稱猶之曰薦敖
爲宰也

楚太宰少宰

宣十二年楚少宰如晉師

成十年太宰子商

成十六年太宰伯州犁

昭元年遂啓疆為太宰

昭二十一年太宰犯

吳太宰

定四年伯州犁之孫嚭為吳太宰

司徒

周禮地官卿曰大司徒其屬有小司徒等官

周

襄二十一年晉欒盈奔楚過周王使司徒禁掠欒氏者歸所取焉

昭二十二年司徒醜杜曰悼王司徒也

宋

文七年鱗矐為司徒

成十五年華喜為司徒

襄九年宋災使華臣具正徒杜云時為司徒疏引周
禮大司徒掌徒庶之政令小司徒凡用衆庶則
掌其政教凡國之大事致民

昭二十二年邊卬代華定為大司徒

哀二十六年皇懷為司徒

魯

昭四年南遺謂季孫為司徒

鄭

襄十年子孔為司徒

衛

哀二十五年司徒期

楚

宣十一年令尹蒍艾獵城沂使封人慮事以授司徒

陳

襄十七年司徒印

昭八年司徒招

哀十一年初轅頗為司徒

司馬

周禮夏官卿曰大司馬其屬有小司馬等官

宋

大司馬

少司馬

隱三年大司馬孔父

僖二十二年大司馬固杜氏以為公孫固又司馬杜

氏以為子魚

文七年樂豫為司馬旋以讓公子印明年宋殺大司

馬公子印

文十六年華耦為司馬是年耦卒蕩虺為司馬

成十五年蕩澤為司馬是年又使老佐為司馬

襄六年宋樂轡以弓楛華弱于朝平公曰司武而楛

于朝難以勝矣杜曰司武司馬時弱為司馬是

年奔魯

襄九年宋災使皇郛命校正出馬工正出車備甲兵

庀武守皇郛時為司馬

昭二十一年華羆為少司馬時羆之父華費遂為大

司馬

昭二十二年宋使公孫忌為大司馬杜云代華費遂
哀二十六年皇非我為大司馬

魯家司馬附

昭四年南遺謂叔孫為司馬按照昭二十五年叔孫氏之司
馬駿戾家臣亦有司馬之名又襄二十二年華
氏以公鉏為馬正杜云馬正家司馬按周禮家

司馬屬夏官主卿大夫采地之軍賦者即使家
臣為之

鄭

襄二年子國為司馬

襄十四年司馬子蟠

楚 大司馬 左司馬 右司馬

僖二十六年子西為司馬

宣四年子越為司馬已而為賈為司馬

成十六年鄆陵之戰司馬將中軍時子反為司馬

哀二年楚殺右司馬公子申

襄三年司馬公子何忌

襄十二年司馬子庚

襄十五年為子馮為大司馬公子橐師為右司馬公

子成為左司馬

襄二十二年公子畸為司馬

襄二十五年為掩為司馬

昭十七年司馬子魚

昭二十三年司馬蘧越

昭二十七年左司馬沈尹戌

昭三十一年右司馬稽

哀四年左司馬販

哀十八年右司馬子國

陳

襄二十五年司馬桓子

蔡

襄八年司馬公子燹

吳

哀十一年父陵之戰吳子呼叔孫曰而事何也對曰

從司馬杜曰從吳司馬所命

司冠

周禮秋官卿曰大司冠其屬有小司冠等官

宋大司冠 少司冠

文七年華御事為司寇

文十六年公子朝為司寇

文十八年樂呂為司寇

成十五年向為人為大司寇鱗朱為少司寇是年二

司寇出奔楚樂裔為司寇

襄九年宋災使樂遄庀刑器杜曰樂遄司寇

昭二十年少司寇華恮

昭二十二年樂輓為大司寇

哀二十六年樂朱鉏為大司寇

魯

文十八年莒僕來奔季文子使司寇出諸竟

宣十八年臧宣叔逐東門氏杜曰時為司寇

襄二十一年臧武仲為司寇

定元年孔子之為司寇也孔子為司寇在定公十年
後

晉

襄三年魏絳曰請歸死于司寇按昭十四年晉士景伯如楚叔魚攝理則晉之刑官又有理之名矣

齊

成十八年慶佐為司寇

鄭野司寇附

昭十八年鄭災子產使司寇出新客禁舊客勿出于
宮又使野司寇各保其徵杜曰野司寇縣士也
按周禮司寇之屬有縣士掌野各掌其縣之民

數而聽其獄訟若邦有大役聚衆庶則各掌其
縣之禁令郊外曰野縣士聽郊野之獄訟故傳
謂之野司寇

衛

昭二十五年衛公孫孟縶奪齊豹司寇

哀二十五年衛侯之入也奪司寇亥政

司空

周禮大宰以官府之六屬舉邦治六曰冬官即

司空也

魯

隱二年司空無駭杜曰魯司徒司馬司空皆卿也

昭四年孟孫為司空以書勲疏云按周禮司勲屬夏官今司空書勲者又是春秋時諸侯之法不可盡

與禮同

晉大司空

莊二十六年晉士蒍為大司空杜曰大司空卿官按

此時晉猶未改諸卿之名故杜云然

文二年司空士穀

成十八年右行辛為司空按文二年杜曰晉司空非卿也襄十九年有司馬司空在軍尉與尉間為六卿之屬則非復從前所謂司空矣疏云雖則非卿職掌不異故傳曰右行辛為司空使修士為之法

襄三十一年司空以時平易道路

鄭

襄十年子耳為司空

司城

春秋宋無司空而有司城所謂以武公廢司空也

宋

文七年公子蕩

文八年蕩意諸

文十六年母弟須

文十八年公孫師

襄六年子罕

昭二十二年樂祈

哀二十六年樂茂

曹

哀七年曹伯陽使公孫疆為司城以聽政按司城宋
官曹不應有蓋曹後衰弱奉宋之政令已久其

見滅于宋宜矣

司敗

楚

文十年子西見成王曰臣歸死于司敗杜曰楚名司

寇為司敗

宣四年若敖之亂箴尹克黃使于齊還歸復命而自

拘于司敗

唐

唐亦有此官見定三年按論語陳亦有司敗蓋唐陳
皆近楚之國設官或相慕效也

師傅

太師太傅太保天子三公也周禮典命公之孤
四命鄭衆云九命上公得置孤卿一人按此則
上公之國乃得置孤侯國有之僭也

晉太師太傅

文六年太師賈佗太傅陽處父按此則晉嘗置二孤

矣

宣十六年晉侯請于王以黻冕命士會將中軍且為

太傅

成十八年士渥濁為太傅疏云此大夫官非孤卿也

羊舌肸亦然

襄十六年羊舌肸為傅

衛少師

襄二十七年衛侯以公孫免餘為少師

楚太師

文元年楚穆王以潘崇為太師

襄十七年太師子穀

蔡太師

襄二十五年太師子朝

隨少師

桓六年楚武王侵隨隨使少師董成

史

周禮春官之屬有太史小史內史外史御史等
官雖各有所職大抵俱以典策為重

周 太史 內史

桓十七年天子有日官杜曰日官天子掌歷者疏云
周禮太史掌正歲年以序事頒告朔于邦國天
子掌歷者謂太史也

莊二十二年周史有以周易見陳侯者杜曰史周太
史也

哀六年楚子使問諸周太史

桓二年周内史聞之按內史掌王之八枋之灋以詔

王治又凡命諸侯及孤卿大夫則策命之

莊三十二年內史過

僖十六年內史叔興

文元年內史叔服

襄十年晉滅偁陽使周内史選其族嗣納諸霍人杜

曰內史掌爵祿廢置者

號

莊三十二年史嚚杜曰史太史也

魯

太史 外史

文十八年太史克

昭二年晉韓宣子來聘觀書于太史氏

昭十七年夏六月甲戌朔日有食之太史答季平子

按桓十七年諸侯有日御杜曰日御典歷數者

蓋即太史也

哀十一年太史固

襄二十三年季孫召外史掌惡臣而問盟首焉孔穎
達以諸侯無內史不得有外史此蓋史官身居
在外季孫從內召之故曰外史非官名也不知
是否按周禮外史掌書外令掌四方之志

晉太史

宣二年太史董狐

襄三十年史趙

昭十五年辛有之二子董之晉于是乎有董史杜曰
辛有周人也其二子適晉為太史

昭二十九年蔡史墨

哀九年趙鞅卜救鄭占諸史趙史墨史龜按周禮太
史之職大祭事與執事卜日其所掌雖有此一
條而卜筮之事自有太卜等官專掌也春秋時
如周之太史晉之史趙等俱嘗以占卜見殆其
後又稍稍侵官耶

哀二十四年晉錄臧石牛太史謝之

齊太史南史

襄二十五年太史書崔杼弑其君又有南史疏云南

史是佐太史者蓋小史也以其居在南謂之南

史耳

昭二十年史嚚

哀十四年太史子餘

鄭太史

襄三十年使太史命伯石為卿按天子策命之事
內史所掌今鄭以太史主之者孔穎達謂諸侯
兼官無內史故也

昭元年公孫黑彊與于盟使太史書其名且曰七子

衛

太史

閔二年狄人囚史華龍滑與禮孔以逐衛人二人曰

我太史也實掌其祭

楚

左史

昭十二年左史倚相疏引禮玉藻云動則左史書之
左史之義蓋本于此

哀十七年左史老

祝

按周禮有大祝其屬有小祝又有喪祝甸祝詛
祝等官皆統于宗伯

宋

哀二十六年祝襄

號

莊三十二年祝應杜曰祝大祝也

魯祝史

昭十七年日有食之祝史請所用幣祝史者蓋兼祝

史二官或掌祝者謂之祝史猶掌卜者謂之筮

史也

齊

昭二十年祝固

鄭

昭十六年祝款

衛祝史

定四年祝鮀

哀二十五年祝史揮義見魯

宗

號

莊三十二年宗區杜曰宗宗人按周禮春官有都宗

人掌都祭祀之禮家宗人掌家祭祀之禮此杜

所謂宗人者

魯宗伯宗人

文二年夏父弗忌為宗伯周禮春官卿曰大宗伯其屬有小宗伯等官

哀二十四年宗人釁夏按宗伯為典禮要職而僅魯一見則當時諸國之廢禮可知其餘以祝宗並稱者大抵皆宗人也然哀公以立夫人大事而

使宗人獻其禮則魯此時宗伯之官亦廢矣可
歎也又按定四年祝佗稱魯公之封有祝宗卜
史杜氏解宗為宗人豈宗伯一官本侯國所無
其有之者僭也而宗人亦春秋時之僅存者歟
掌卜之官

周禮春官有太卜卜師卜人龜人蕘氏占人筮
人等官

魯卜士史

桓六年子同生公使卜士負之按禮內則曰國君世子生三日卜士負之

文十八年卜楚邱杜曰魯掌卜大夫

襄九年穆姜薨于東宮始往而筮之遇艮之八史曰是謂艮之隨

晉筮史

閔元年卜偃杜曰晉掌卜大夫

僖十五年史蕢杜曰晉卜筮之史按周禮卜筮之官初

不名史蓋因周制史占墨而其後掌卜者亦名史也

僖二十八年曹伯之豎侯孺貨筮史

成十六年鄆陵之戰公筮之史曰吉

齊史

襄二十五年崔武子欲取棠姜筮之遇困之大過史皆曰吉

鄭

昭十八年鄭災使公孫登徙大龜杜曰登開卜大夫

衛

哀十七年胥彌赦占之杜曰赦筮史

秦

僖十五年卜徒父杜曰秦之掌龜卜者

梁

僖十五年卜招父杜曰梁大卜

楚卜尹

昭十三年平王使觀從為卜尹

邾史

文十三年邾文公卜遷于繹史曰利于民而不利于

君

掌樂之官

周禮宗伯之屬有大司樂太師等官

衛太師

襄十四年公飲孫蒯酒使太師歌巧言之卒章

楚樂尹

定六年昭王以鍾建為樂尹杜曰樂尹司樂大夫

掌工之官

按周禮缺冬官後人以考工記補之其實司空
掌土非掌材者也觀宋魯俱有司空而復有工
正可知愚意周人百工之事已散見于六官之
屬而太宰司徒為多至司空所掌今不可考學
者不必強為之說

宋 工正

襄九年宋災命工正出車疏云周禮司馬無掌車之
官巾車車僕職皆掌車乃為宗伯之屬又據昭
四年司馬與工正書服是諸侯之官有工正屬
司馬也

魯 工正

昭四年司馬與工正書服杜曰車服之器工正所書
正義云工正掌作車服故與司馬書服按定四

年有郈工師駟赤家臣也

齊工正

莊二十二年陳公子完奔齊桓公使為工正

楚工尹

文十年楚子使子西為工尹杜曰掌百工之官

宣四年為賈為工正

宣十二年工尹齊

成十六年工尹襄

昭十二年工尹路

昭十九年工尹赤

昭二十七年工尹壽

哀十八年工尹遂固

行人

按周禮秋官有大行人掌大賓之禮與大客之儀小行人掌使適四方協賓客之禮按春秋所書如鄭良霄陳于徵師魯叔孫婁之類乃一時

奉使者亦曰行人然非專官故不載

周

襄二十一年藥盈過周辭于行人

魯

文四年使行人私焉

晉

襄四年子負

襄二十六年子朱

鄭

襄二十四年公孫揮

衛

哀十二年子羽

吳

成七年楚狐庸為吳行人

定四年伍員為吳行人

校正

疏云校正當周禮校人按周禮夏官校人掌馬

政

宋

襄九年宋災命校正出馬杜曰校正主馬

魯校人

哀三年桓僖宮災命校人乘馬

晉

成十八年弁糾御戎校正屬焉

巾車

周禮春官巾車掌公車之政令

魯

哀三年桓僖宮災子服景伯命巾車脂轄

晉

襄三十一年巾車脂轄

隧正

周禮大司徒之屬有遂人掌邦之野鄰里鄼鄙

縣遂使各掌其政令刑禁以起政役隧與遂同
杜曰五縣為遂即周禮文也

宋

襄九年宋災令隧正納郊保奔火所正義曰此隧正
當天子之遂大夫周禮每遂中大夫一人各掌
其遂之政令

魯 正夫

襄七年叔孫昭伯為隧正

襄二十三年臧孫使正夫助之杜曰正夫隧正正義
曰隧正當屬司徒臧孫司寇也而使之者其時
蓋兼掌之

封人

周禮地官有封人掌為畿封而樹之孔穎達云
封人職典封疆居在邊邑

宋

昭二十一年呂封人華豹

鄭

隱元年穎考叔為穎谷封人

桓十一年祭封人仲足

楚

宣十一年令尹蒍艾獵城沂使封人慮事杜曰封人

其時主築城者疏引周禮大司馬大役與慮事

鄭云慮事者封人也于有役司馬與之屬賦丈

尺與其用人數也是封人主造城邑故云其時

主築城者

蔡

昭十九年楚子之在蔡也鄖陽封人之女奔之生太

子建

蕭

文十四年宋高哀為蕭封人

褚師

杜曰市官也

宋

襄二十年褚師段

哀八年褚師子肥

鄭

昭二年公孫黑請以印為褚師

衛

昭二十年褚師圃褚師子申

哀十五年褚師比

御士

杜曰周禮王之御士十二人按大司馬之屬有御僕下士十有二人諸侯御士雖不知其數亦附見焉

周

僖二十四年太叔攻王王御士將禦之

襄三十年單公子愆期為靈王御士

宋

昭二十一年華多僚為御士杜曰公御士

魯御

昭四年公御萊書

晉僕人

襄三年魏絳至授僕人書杜曰僕人晉侯御僕

楚

襄二十二年子南之子棄疾為王御士

膳夫

周禮太宰之屬有膳夫

周

莊十九年王收膳夫之秩

晉膳宰

昭九年膳宰屠蒯按其時亦稱宰夫見宣二年

饗人

杜曰饗人食官按周禮天官之屬有內饗外饗

魯

昭二十五年饗人檀

齊

僖十五年雍巫杜曰雍巫雍人名巫即易牙也雍饗
字通用

襄二十八年公膳日雙雞饗人竊更之以鶩

奄人

周禮太宰之屬有內小臣寺人等官皆奄人掌
宮內之事者也

宋司宮 巷伯 寺人

襄九年宋災令司宮巷伯儆宮

襄二十六年寺人惠牆伊戾

魯司宮

昭五年南遺豎牛攻大庫之庭司宮射之

晉寺人

僖五年寺人披

齊寺人

僖二年寺人貂

鄭司宮

昭十八年鄭火商成公敝司宮

衛寺人

哀十五年寺人羅

以上數國共有之官

春秋識小錄卷一

欽定四庫全書

春秋識小錄卷二

上元程廷祚撰

春秋職官考略中

周

三吏

杜曰三吏者三公也曲禮云五官之長曰伯其
擯于天子也曰天子之吏鄭云謂三公也

成二年王命委于三吏

卿士

杜曰卿士王卿之執政者詩皇父卿士史記厲
王以榮公為卿士又卿士一曰天子之老見昭
十三年按哀十六年楚白公謂石乞曰王與
二卿士二卿士謂子西子期也楚既僭王其執
政者亦曰卿士

隱三年鄭武公莊公為平王卿士

隱八年虢公忌父始作卿士于周

隱九年鄭伯為王左卿士 按鄭伯為左卿士則虢

公林父右卿士也鄭伯奪政之後蓋周公黑肩

代之故桓五年伐鄭之役虢將右軍周將左軍

襄十五年王叔犇晉單靖公為卿士以相王室

官師

官師士也疏引禮祭法云官師一廟鄭云官師

中士下士也

襄十五年官師從單靖公逆王后于齊

尉氏

杜曰尉氏討姦之官正義曰周禮司寇之屬無此官蓋起于周衰按秦設廷尉本此

襄二十一年將歸死于尉氏

候

杜曰候送迎賓客之官周禮夏官有候人

襄二十一年使候出諸輟轅

宋

左師 右師

宋之六卿左右二師司馬司徒司城司寇也置
二師爲卿不知何時之制他國無之

僖九年使公子目夷爲左師以聽政

文七年公孫友爲左師公子成爲右師

文十六年華元爲右師

成十五年魚石爲左師又向戌爲左師

襄九年宋災使華閱討右官杜曰時爲右師

昭六年華亥代華合比爲右師

昭二十二年仲幾爲左師樂大心爲右師杜曰仲幾

代向寧樂大心代華亥

哀十四年向巢爲左師

哀十八年宋殺右師皇瑗復以皇緩爲右師

哀二十六年靈不緩爲左師

鄉正

杜曰鄉正鄉大夫也按周禮地官有鄉大夫每鄉卿一人

襄九年二師令四鄉正敬享疏云周禮六鄉即以卿爲之長此云二師令四鄉正則別立鄉正非卿典之但其所職掌當天子之鄉大夫耳至諸侯應立三鄉而宋有四鄉者當時所立非正法也
司里

杜曰里宰也按周禮地官有里宰爲遂大夫之

屬國語賓至司里授館

襄九年使伯氏司里疏云周禮里宰謂六遂之內二十五家之長也此言司里謂司城內之民若今城內之坊里也按此則司里似非宋之常官

帥甸

杜曰郊甸之帥正義云近國爲郊郊外爲甸周禮載師掌任土之法先近郊次遠郊次甸地則帥甸者正甸地之帥也杜言郊甸舉類言之耳

文十六年宋昭公將田孟諸未至夫人王姬使帥甸
攻而殺之

迹人

杜曰主迹禽獸者按周禮有迹人屬地官掌邦
田之地政

哀十四年迹人來告

門官

杜曰門官守門者師行則在君左右正義以爲

蓋周禮虎賁氏之類故在國則守門師行則在君左右

僖二十二年泓之敗門官殲焉

門尹

周禮司門屬地官掌授管鍵以啓閉國門國語亦曰門尹

僖二十八年門尹般

哀二十六年門尹得

大尹

杜曰大尹近臣有寵者按此蓋亦庵寺之流

哀二十六年六卿因大尹以達大尹常不告而以其
欲稱君命以令

魯左宰

襄二十三年公鉏自季氏出為左宰杜曰自家臣仕
于公也至左宰為何官不可詳矣

周人

杜曰周人司周書典籍之官

哀三年桓僖宮災命周人出御書 春秋後傳云晉之乘楚之檮杌魯之春秋皆東遷之史也古者諸侯無私史有邦國之志則小史掌之而藏周室魯人所謂周人御書晉人所謂辛有之二子董之晉于是有董史者也是故費誓繫于周書漢汝江沱至于譚大夫下國之詩皆編入于南雅自三史作而國自為史矣其論最核附識于

此

虞人

周禮地官之屬有山虞澤虞等官 按昭四年
申豐論藏冰曰山人取之杜曰山人虞官

哀十四年西狩于大野叔孫氏之車子鉏商獲麟以
為不祥以賜虞人

賈正

孔穎達曰如周禮之賈師

昭二十五年臧會奔郕郕鮒假使為賈正焉

圉人

周禮夏官有圉師圉人掌養馬者

莊三十二年圉人犇

齊

二守

王制次國三卿二卿命于天子一卿命于其君

命于天子者則曰王之守臣其後諸侯之卿皆

自命之不聞有守臣矣

僖十二年有天子之二守國高在

左相

襄二十五年慶封為左相 史記崔杼為右相按相

之名始于此

士

成十八年齊侯使士華免以戈殺國佐于內宮之朝

注華免齊大夫疏曰士者為士官也官掌刑政

故使殺國佐然則士蓋即士師之官否則御士之屬而杜誤解以為大夫也

衡鹿

舟鮫

虞候

祈望

昭二十年山林之木衡鹿守之澤之萑蒲舟鮫守之
藪之薪蒸虞候守之海之鹽蜃祈望守之正義
曰周禮司徒之屬有林衡之官掌巡林麓之禁
此置衡鹿以守山林是也舟所以行水鮫大魚
之名澤中有水有魚故以舟鮫為官名也周禮

山澤之官皆名為虞又數是少水之澤立官使
之候望故以虞候為名海是水之大神有時祈
望祭之因以祈望為主海之官也此皆齊自立
名故不與周禮盡同 按祈望後世立鹽官之
始 又襄二十五年有申蒯侍漁者杜曰侍漁
監取魚之官

銳司徒 辟司徒

杜曰銳司徒主銳兵者辟司徒主壘壁者

並見成二年

鄭

少正

杜曰少正鄭卿官也正義曰十九年傳云立子
產為卿故知少正為鄭卿官也春秋之時官名
變改周禮無此名

襄二十二年少正公孫僑

令正

杜曰主作辭令之正

襄二十六年子太叔為令正 按當時列國皆重辭
命而鄭人獨為令正之官則其尤知所重可見
矣孔子美之有以夫

執訊

杜曰通訊問之官

文十七年鄭子家使執訊而與之書以告趙宣子

馬師

襄三十年馬師頡公孫鉏

昭七年罕朔

外僕

杜曰外僕掌次舍大夫按周禮掌舍掌次俱屬

太宰

見襄二十八年

昭十三年子產命外僕速張于除

府人 庫人

昭十八年鄭火使府人庫人各徹其事疏云周官有大府內府外府天府玉府泉府而無掌庫之官蓋府庫通言庫亦謂之府也諸侯國異政殊故府庫並言也

司墓

按周禮春官之屬有墓大夫

昭十二年司墓之室有當道者杜曰此掌公墓大夫徒屬之家也

門子

杜曰門子卿之適子按周禮小宗伯掌三族之別以辨親疎其正室皆謂之門子鄭云正室適子將代父當門者也

襄九年同盟于戲鄭六卿及其大夫門子皆從鄭伯襄十年子孔為載書以位序聽政辟大夫諸司門子

弗順

衛

右宰

隱四年右宰醜

襄二十七年右宰穀

秦

右大夫

成二年右大夫說

襄十一年右大夫詹

庶長

杜曰秦爵

襄十一年庶長鮑庶長武

襄十二年庶長無地

不更

杜曰秦爵

成十三年不更女父 疏引漢書稱秦商君之法戰

斬一首者賜爵一級其爵名有曰不更有曰左

右庶長者但春秋之世已有此名則不盡始于

商君矣

晉

執秩

杜曰主爵秩之官

僖二十七年作執秩以正其官

公族大夫

卿之適子為之正義曰公族之官掌教公之子弟孔晁註國語云公族大夫掌公族及卿大夫

子弟之官是卿之適子屬公族也

宣二年趙盾請以括為公族

成十六年卻隼將新軍且為公族大夫

成十八年荀家荀會藥鷹韓無忌為公族大夫

襄十六年祁奚韓襄藥盈士鞅為公族大夫

餘子

卿適子之母弟為之杜曰亦治餘子之政正義

曰餘子主教卿大夫適妻之次子也下文庶子

既為公行則卿大夫之妾子亦餘子之官教之
矣

見宣二年

公行

卿之庶子為之亦曰旄車之族正義曰主公車
行列謂之公行車皆建旄謂之旄車之族

見宣二年 孔穎達曰公族餘子公行周禮無此三
官之名夏官有諸子下大夫掌國子之倅事與

公族同也春官有巾車下大夫掌王之五路事
與公行同也惟無餘子耳

僕大夫

杜曰太僕也周禮有太僕屬夏官

成六年韓獻子將新中軍且為僕大夫

乘馬御

杜曰乘車之僕疏曰當周禮齊僕按周禮大司
馬之屬齊僕掌馭金路以賓朝覲宗遇饗食皆

垂金路國語曰贊僕

成十八年程鄭

襄十六年虞邱書

司士

杜曰車右之官按此與周禮司士不同疏謂蓋

司右之類周禮戎右中大夫司右上士也

成十八年荀賓為右司士屬焉

騶

成十八年程鄭為乘馬御六駟屬馬使訓羣駟知禮
杜曰六駟六閑之駟周禮諸侯有六閑馬疏曰
鄭元註月令七駟云謂趨馬主為諸官駕說者
周禮夏官趣馬掌駕說之頒是駟為主駕之官
也

輿師

杜曰主兵車者

見成二年

七輿大夫

杜曰侯伯七命副車七乘故有七輿大夫之官
僖十年惠公殺七輿大夫七人

襄二十三年七輿大夫與之

復陶

杜曰主衣服之官疏云復陶衣冠之名亦見昭
十二年義則未聞

襄三十年使為君復陶

縣師

卷二

杜曰縣師掌地域辨其夫家人民按此官屬周禮大司徒

襄三十年以為絳縣師

甸人

杜曰主為公田者周禮太宰之屬有甸師主耕耨王藉禮文王世子公族有罪致刑于甸人

成十年甸人獻麥

獸人

周禮天官有獸人之職

宣十二年子有軍事獸人無乃不給于鮮

楚

令尹

莊四年鬬祈

彭仲夷申俘也文王以為令尹見哀十七年

莊二十八年子元

莊三十年鬬穀於菟

僖二十三年成得臣

僖二十八年蔿得臣

僖三十三年子上

文十二年楚令尹大孫伯卒成嘉為令尹

宣四年鬬般是年子越代之

宣十一年蔿艾獵 傳曰蔿敖為宰疏云周禮六卿

大宰為重遂以宰為上卿之號楚臣令尹為長

故從他國論之謂令尹為宰也

成二年子重

襄五年楚殺令尹子辛子囊為令尹

襄十五年公子午

襄二十二年楚殺令尹子南以蔿子馮為令尹

襄二十五年屈建

襄二十九年王子圍

昭元年遂罷

昭十三年子旗

昭十七年陽句

昭二十三年囊瓦

定六年子西

哀十六年白公既死沈諸梁兼二事謂令尹與司馬

也後以子國為令尹

莫敖

桓十一年屈瑕

莊四年屈重

襄十五年屈到

襄二十二年屈建

襄二十五年屈蕩

昭五年楚子以屈申為貳于吳乃殺之以屈生為莫敖

左尹

宣十一年子重

昭十八年王子勝

昭二十七年郤宛

右尹

成十六年子辛

哀十五年公子罷戎

襄十九年鄭子革奔楚為右尹 按子革自襄十九

年奔楚為右尹至昭十二年仍為此官而中間

為右尹者又有子干或楚此官不止一人或子

革先為右尹去任他職而子干代之及子干出奔而子革仍為右尹皆未可知

襄二十七年以齊人申鮮虞為右尹

昭元年子干按子重子辛俱以貴介為左右尹出將重兵其後並為令尹則左右尹蓋亦楚之尊官襄公以後漸用羈人稍稍降矣

箴尹

宣四年箴尹克黃

昭四年箴尹宜咎

定四年令尹固鍼即箴

沈尹

宣十二年沈尹將中軍

成七年使沈尹與王子罷分子蕩之室

襄二十四年沈尹壽

昭四年沈尹射

昭五年沈尹赤

昭十九年沈尹戌

哀十七年沈尹朱 杜云沈當作寢哀十八年有寢

尹吳由于蓋即沈尹也

連尹

宣十二年連尹襄老

襄十五年屈蕩

昭二十七年連尹奢 時伍奢已死

清尹

成七年清尹弗忌

宮殿尹

襄十五年養由基

昭元年子皙

昭六年棄疾

揚豚尹

襄十八年揚豚尹宜

昭尹

昭十二年昭尹午

陵尹

昭十二年陵尹喜

芋尹

昭七年芋尹無宇

昭十三年芋尹申亥 按陳亦有此官哀十五年芋

尹蓋

郊尹

杜曰治郊竟大夫

昭十五年楚子奪成然邑而使為郊尹

莠尹

昭二十七年莠尹然

王尹

服虔云王尹主宮內之政疏謂王一作工

昭二十七年王尹麋

中廩尹

昭二十七年陽令終

監馬尹

昭三十年大心

監尹

定五年監尹賡

武城尹

哀十七年公孫朝 按定四年有武城黑蓋亦武城

尹也

環列之尹

杜曰宮衛之官列兵而環王宮

文七年穆王使潘崇為大師且掌環列之尹 按楚之官多以尹名者然自箴尹以下往往不得其命名之義闕之可也沈與武城皆地名豈即縣邑之長如所謂縣尹者與 正義曰楚國名上卿為令尹者釋詁曰令善也釋言云尹正也言用善人正此官也楚官多以尹為名皆取其正

直也 按襄十五年楚公子午為令尹公子罷
戎為右尹為子馮為大司馬公子橐師為右師
馬公子成為左司馬屈到為莫敖公子追舒為
箴尹屈蕩為連尹養由基為宮廩尹此數官皆
楚之要職也

右領

昭二十七年右領馭將師

哀十七年右領差車

司馬

昭二十年城父司馬奮揚此官蓋周禮之都司馬也

夏官有都司馬掌都之軍賦者

正僕

杜曰正僕太子之近官孔穎達以周禮太僕當之

昭十三年因正僕人殺太子祿

大閹

杜曰若今城門校尉官正義謂亦周禮司門之類

莊十九年鬻拳自刎楚人以為大閹

已上一國自有之官

縣邑之官

附

春秋縣邑之長皆大夫也其別有公邑有私邑
公邑屬於公朝如趙衰之于原狐漆之于溫是
也私邑則國卿采地如費成邠之于魯三家是

也公邑私邑雖分治于諸大夫而皆以國卿聽其成襄三十年趙武問絳縣大夫則其屬也孔氏謂絳非趙武私邑而武分掌之又昭二十八年魏戊不能斷梗陽之獄上之獻子是也其時雖無監司守令之名而大概與後世亦復相似縣邑之官列國稱名不一附載于左

縣大夫

僖二十五年晉趙衰為原大夫狐溱為溫大夫

昭二十八年晉魏獻子為政分祁氏之田以為七縣
分羊舌氏之田以為三縣各置大夫 按哀四
年陰地之命大夫士蔑孔氏正義曰命大夫乃
特命大夫總監陰地者以其去國遙遠別為置
監亦詹嘉處瑕之比

守

僖二十五年晉侯問原守于寺人勃鞞

昭二十五年晉滅鼓使涉佗守之

宰

襄九年魯費宰南遺定八年成宰公斂處父定十年
邠宰公若 費成邠魯三卿采邑也宰本家臣
之名而亦不專為家臣故哀八年有王犯嘗為
武城宰論語亦有武城及莒父宰孔穎達謂公
邑稱大夫私邑稱宰按昭二十六年又有成大
夫公孫朝是私邑亦稱大夫公邑亦稱宰也正
義之云非通論矣

人

昭九年周甘人亦稱甘大夫

昭二十一年宋廚人濮

文十五年魯卞人

襄十年魯耶人紇

成二年衛新築人仲叔于奚 昭二十六年子猶之

人高齋家臣亦稱人也

公

襄二十五年齊棠公

楚有申公息公白公葉公宣十一年諸侯縣公皆慶

寡人

君

昭二十年楚棠君尚

縣尹

莊十八年初楚武王克權使鬬緡尹之

襄二十六年穿封戌方城外之縣尹也

春秋識小錄卷二